




金文通公集卷之二十三

吳江金之俊豈凡著



贈文林郎吏科右給事中訥公嚴公暨配江孺
人合葬墓表

吏科都給事中今候補卿嚴君沆痛贈公當君未第
時早捐館舍迨君爲京朝官距公歿且十年矣廼蒙
恩予假得歸葬公于梅園圩之陽祈于時銜哀致誠得

當世名公。詳其贈公之懿德茂行。泐于墓。余亦為之傳。以應君之請。今君又將以其母江太孺人祔。距公葬又十年。君既悲太孺人之歿。而轉悲贈公之墓木行且拱也。震悼猶新。復以合葬墓表屬余。余雖不文。其何忍辭。謹按狀。公姓嚴氏。諱敏。更名武順。字忍公。晚年復故名。易字訥公。別號餘人。係漢子陵後裔。父太常順菴公。諱大紀。公其仲也。兄弟三人。皆以文名當世。所號餘杭三嚴者也。公嫡母高夫人無子。母李生公。與弟無勅同母。伯兄母楊氏也。公又撫于無子。

李氏。蓋一堂四母。公兄弟事之如一。其兄弟友愛亦如一。皆穉齡而孤。相與篝燈夜課。窮經史。悲歡歌泣。靡所不合。公早慧。七歲為咏蟲詩。年十四為督學蘇紫溪先生所簡拔。名震于庠。公兄弟自是文重三吳。為時名士。公每試浙闈不利。遂遊南雍。與方孟旋聞子將楊兆開諸先生講學。倡和牛耳詞壇。時文習久。剗多離經竊子。有江河莫挽之勢。公力追太始。首揚經傳。一去其支離浩汗之習。而制莠之文體。一正。蓋自公始也。公又沉潛嗜古。好為古文詞。靜謐遠到。典

瞻風華。爲詩歌。遠追陶靖節。韋蘇州。閒曠清醇。而雋
永過之。于是三吳之間。來遊者日益衆。投分結納。無
間遠邇。公亦慷慨交遊間。相契如兄弟。嗣講學于小
築山房。爲讀書社。集其子弟門人。以源本經傳。討論
性理爲務。天下學者。皆以嚴氏之學爲真傳。一時四
方碩彥。南自八閩荆襄。北至三秦齊豫。以及豫章海
虞。澄江句曲雲間諸名邦。贈縞班荆。戶屢恒滿。凡藩
牧有司。郡邑士大夫。咸造廬請謁。望見公顏色。以爲
榮焉。公性善飲。種秫廣釀。與文人遨遊山水。麴生墨

史恒載以從事。分曹賦詩。傾觴極歡。殊有晉代竹林
高致。公詩文旣絕。所爲尺牘小品。取法東坡山谷。名
言疊疊。饒有風致。又工書法。及六書各體。皆爲時重。
至于琴奕丹青。無不探奇抉奧。尤留心當世之務。每
曰。文藻雖工。而不適于時用。無益也。舉古今成敗得
失。歷代沿革典故。皆如目擊其人。親見其事。燎然可
指諸掌。其家法森嚴。子弟咸肅敬。無敢軼禮。時伯季
之子曰渡。曰津。公之子曰沆。皆後先有國士之目。乃
雍雍門內藹如也。是皆公之教也。平時周恤里黨。及

戚友之乏絕囊無長物。往往假貸濟之。辛巳。杭郡旱。疫。公爲勸輸賑給。全活甚衆。甲申。兵起。公謀保餘杭。請于令。爲修武備。廣儲蓄。邑賴以安。惜哉。公不試于時。然丁明季末造。文教中衰。識者以爲運會風氣之懼。而公以一韋布振起其間。遂力還醇雅。如唐之韓愈。宋之歐陽。使天下之人。拊心抑志。咸師宗之。昔人有推韓愈。孟子功不在禹下。而公亦能挽之。如是。終以抑于當世。不克一展其才。僅稍稍見于救荒備患。諸小節。然公自是亦足以彰其梗槩已。甲申。聞鼎湖。

之變。北嚮號慟。卜築西溪河渚。槿籬植菊。環以竹逕。作採菊吟三十二章。每棹槳扶筇。領七十二賢峯之勝。因題其室曰聊度。蓋取王無功聊度世以逍遙之意也。公旣純孝篤摯。歲時伏臘。享祠展墓。每抱痛太常公之早背。于四母之家。贈遺周恤。母稍異同于其間。爲慈母服三年。哀毀斷葷酒。如同所生。兄印持公卒。號慟骨立。爲百憶詩。酸楚動人。弟無勅。旬日不見。嘗中夜起坐。念之不忘。此公之忠勤孝友。不克徵爲世用。而至性不移。大節細行。罔或稍渝。殆勝于履富。

貴席寵祿者有如此公早年問禪于雲棲獲悟無生之旨每與聞谷慧文紹覺諸尊宿等結方外友武林禹航諸名利悉藉公爲外護四十年如一日晚值多難之會嘗匡坐晏如了不加意季子渤弱冠多才遭亂殞于逆旅公恻然曰聚散泡影也悲歡電業也靈臺幾何其堪此淪喪乎蓋早已了徹幻緣足以知公平時道德文章確有領會故能一死生解脫形骸臨險患而不亂有如此公旣韜藏蘊抱惟著書以傳有焉文集聊度居稿積分襍著等書數十種行于世嗟

乎傳所爲隱居求志沒世名稱者公殆其人也歟然則公之德業文行肝腸氣誼炳炳烺烺于天壤間可法可傳公雖歿而實未常亡也孺人姓江氏杭之名族也生而孝友多讀書明義禮父文學叔洪公愛異之擇所字久而未得嘗與贈公同藝學最契厚時贈公元配俞孺人早世遂委禽焉結褵之夕贈公爲孺人言曰從來人家父母不順兄弟不和皆由婦人而起我家同居合爨希踪古人幸相黽勉勿以稚年自怠孺人亦具以庭訓所聞答公也先是公嫡母及生

母早世。篤事慈母李氏孺人。色養惟謹。歿則執三年喪。盡哀。慈姑有繼女適陸。嫁時營資遣送。撤已奩。以爲裝。歿又撫其遺女。又爲陸女資嫁。其事慈姑始末如此。贈公兄弟皆孤貧。時相依倚。蠶鹽課讀。孺人脫瑄珥爲資。身則骨簪練服。備針線以佐之。而公屢絀進取。曾不稍爲芥蒂。公雅好賓客。廣交遊。信宿歡呼。瓶罍未嘗告罄。晚年公棄舉子業。爲名山之遊。結客攜朋。禪關花嶼。暢意流連。往往兼旬不返。不計家有無。孺人課子若孫。早晚勤事。至于澣濯縫紉。析薪餽

食。俾屏居蕭寺。絕無他營。以擾其心。其事公撫子。旣能勉禮賓朋。兼能敦訓伯仲。有如此。庚辰辛巳。歲屢薦凶。家屑糠榆以充腹。而公家之食指故繁。孺人之拮据尤苦。乙酉突罹兵燹。嘯聚潢池。焚掠時至。孺人于此離憂患中。多方保濟。時季君竄徙。驚悸感疾而殞。孺人傷悼過甚。且轉輾流移。盜氛不息。而贈公復卒于餘杭之遷居。孺人重感憂勞。且疊嬰悲傷。以致成疾。此其遭變亂。歷艱辛。獨力撐持于凶荒死亾。爲丈夫子之所難能者。有如此。迨長君服官以來。晉掌

刑垣耑理

朝審孺人詔之曰。汝家世仁德。太常功在民生。而父雖不見用。卽迪吉錄一書。實不忘所志。以立其言。言足善世。汝今職封駁。須爲所當爲。可無佐。

聖天子欽恤至意。以廣乃祖乃父之遺緒耶。自是給諫君多所寬卹。奏書每進。

上覽而嘉焉。多奉

俞旨。此皆得之慈訓也。嗣後或宦署閒居。或千里致命。惟以服官盡職。求爲人臣。以盡爲人子之道。雖古名

媛。不過是孺人二子。皆自乳抱。曰吾非不能催乳。倘習氣漸染。如古人胎教何。故寧自勞苦耳。及兩子長。而受書。贈公每急于成名。呵責幾過。孺人且解且諭。聲與淚俱。至于校菴試文。慮蒙呵譴。嘗丙夜以向。至有徹旦未寢者。視前後兩媳如子。憐愛備至。得一孫女。卽爲之保抱。攜持。惟恐弱媳之勞乏。以故兩媳歿身不忘。婉轉姑側。皆以母恩難報爲言。此其慈恩可知已。若夫周戚族。御僕婢。惠而有禮。和而多恕。此尤詳細。節持大體。敬恭以律。已忠孝以誠。後者又如

此嗚呼。按贈公于文。寢衰之季。卒抗跡壇坫。橫經講義。俾學者知傳註守正學。一切剽竊亂經之習。若迅風之捲秋籜。功不可謂不高矣。卒不能博一第。以大展其志。至今學者傷焉。若孺人佐公力業。律身以教其子。子克有成矣。更篤其孫。身膺翟芾。將一紀而終。天之報施善人。寧有艾耶。今長君受知

聖主。成進士。即讀中秘書。改授諫垣。慷慨論列。清論滿朝。而公之長孫曾復從中秘。授給諫。旋遷御史臺。次博。又讀孫吳書。鷹揚盛世。一時父子列臺諫之

栢。梧接武。弟兄奪武。文之幟。揆奮齊踪。倚歟。休哉。信乎。嚴氏之文名。滿天下。惟我公與孺人。實振起之。嚴氏之功名。且奕世。又惟我公與孺人。實厚培之。已。余故表而識之。以俟後之採風者。攷焉。

贈文林郎吏科右給事中嚴訥公先生傳

嚴訥公先生諱敏別號餘人浙之餘杭人也嚴氏在浙者皆漢子陵後裔遠莫可紀公始祖自姚江遷餘杭世有隱德至高祖鳳山公曾祖朝陽公兩世薄宦京師廬墓託焉順菴公諱大紀遂以順天籍登嘉靖戊午賢書明成進士守正仗氣節權執政引與聯族拒之幾及禍居官廉敏有聲游歷藩臬廣惠懷裕幹畧凡所至見德所去見思累官太常卿丈夫子三公其仲也生而穎異七歲爲咏蟲詩句卽驚人

年舞象。受知蘇學憲紫溪先生。與伯兄調御。季弟勅。鼎抗家學。海內有三嚴之目。公夙矜標格。爲制義。力宗正始。不徇流俗。營詭售。屢誦省闈。挾策游南雍。所善方孟旋。聞子將楊兆。開諸公皆當代名宿。相與晨夕切劘。業日益進。譽日益起。歸與都人士訂交。小築山房。牛耳壇坫。英髦響附。當是時。明末造文習久。利多雜經竊子。襲僞畔真。識者有蛙聲紫閨之懼。雖南國江右。秦豫荆閩。所在建旗鼓。然兢兢江河莫晚。公獨與伯季氏振揚經傳。排決衆流。擴清所及。如障百

川而東也。四方躡屨定交。舟車輻輳。而嚴氏之學遂大昌。明于天下。公天資弘瞻。疆力博綜。尤能爲古文。詩歌出入騷雅。閑於麗則。性愛陶靖節。韋蘇州詩。而清新雋逸。似公又過之。尺牘小品。則法東坡山谷。加以天然藻綵。風致栩栩。令讀者心曠神怡。與伯氏俱擅工書法。正書行草。及八分篆隸。無不臻妙。鑒別尊彝。幘素雅號博物。卽微而琴奕末技。亦必探奧窮幽。不造極不已。性喜飲好客。多營秫。廣釀事。客至分曹賦詩。傾觴極歡。乃罷。生計有無不問也。然雖寄情

詩酒淋漓楮墨間。恒留心當世之務。凡古今成敗得失。及歷代制度沿革之詳。靡不竟其原委。較若列眉。有扣之者。響答不窮。中歲既困於有司。慨然謝鉛槧。不事。悉哀生平所著述。題曰焉文集。志終隱也。而益抉其未發之蘊。以指授家塾。自伯季之子曰渡。曰津。及長君沆。後先成國士。爲海內所刮目。乃其教一本。

不溺榮利。故自長君已卯舉於鄉。公車十餘載。食貧飭行。啜菽承歡。了無悴色。鄉人以真孝廉稱之。蓋養志然已。甲申聞鼎湖之變。北向號慟。憤

不欲生。因讀卜式傳。爲之掩卷低徊久之。自是以後。益絕意人間。卜築西溪河渚。顏其室曰聊度。蓋取王無功聊度世以逍遙之句也。爲槿籬竹徑。列植甘菊。其中作采菊吟三十六章。每風日晴好。輒棹槩扶筇。與樵童漁父。行歌往返。極目七十二賢峰。窅然有遺世之樂。已而肱篋震隣。移棲禹航之古秋堂。睠懷河渚。鬱鬱發病不起。易簣之夕。猶正襟染翰。書論詩卷一。筒凡數百言。貽季弟。儻然而逝。噫。可異也已。公天性惇摯。篤行不倦。痛太常公蚤背。遇歲時伏臘。未嘗

不嗚咽流涕。終身孺慕如一日。太常元配高淑人。有子而殤。公與伯季所自出。並他母撫公者為四母。存養沒哀。竭盡子道。靡有同異。甚而母黨之贈遺。賙卹亦罔有厭倦心。于昆弟間怡怡友愛。自填篋藝苑。臯比譚經。以至遂初樂志。始終心跡無間。里閭中歎為德門人瑞。志慷慨。不侵然諾。赴人之急。如救火追亡事已。終不形德色。公交滿天下。尤與太末方孟旋。虞山王季和。嘉定李長蘅。為道德性命之友。聞三君病篤。彌留時。皆不遠數百里。趨赴訣別。求之悠悠世道。

中豈可得耶。居恒和易接物。坐人春風。至引義責善。侃侃不回。有中心負曲者。蹶蹶不敢令。公知爭比之。王彥方云。諸凡賑饑施藥。救死扶病。與夫掩骼埋胔。真孜孜為善。惟日不足者矣。蚤歲嗜竺典。晚嬰世難。益津津無生之旨。廣扣禪宿。機緣冥契。當携家避地。萑苻屢警。匡坐晏如。了不為懾。季子渤。弱冠而才體素羸。驚心化離。遂病殞逆旅。公痛極三號。既而悄然若失。曰。聚散泡緣也。悲歡電業也。靈臺幾何。其堪淪喪乎。嗚呼。公殆有進於道者乎。公學窺五際。既不及

爲世用以著書自娛計公行藏諸集不下百十餘種自經史以及百家言靡不有纂訂輯註其著述之富且核亦近代作者所罕有也長君沆距公亡八載始登順治乙未進士讀中秘書改授諫垣以

覃恩贈公如其官雖祿不逮養而長君力學博文能讀父書筮仕卽著風節今日旣爲名給諫他日必爲名公輔行將盡顯公之學于朝且欲次第行公之文于世有子若此俾其學其文其人並傳不朽公亦可以無憾也已

外史氏曰昔人稱經師非難人師實難公懲末造文靡兄弟相頡頏以登扶大雅比于韓歐起衰視扶風高密功廓如矣乃其隱心質行悟物化俗又何讓太丘叔度也當潢池乘亂瞋目山城勢幾立糜公奮臂策保禦安于覆盂豈硜硜譚經家所優哉儉德不試以克開厥後其所施有不可勝道者耶夫積厚者其流光古志之矣

誥封正一品夫人嚴氏行畧

余正配一品夫人嚴氏產自松陵世族年十五尚未

因父文學端所嚴公慎擇壻鮮克許可忽一夜夢

其祖先告之曰有金姓來求婚者必許之當大昌次

適有媒至告以姓氏恰符夜夢遂許婚焉年十八

于歸時先兩大人俱年踰六旬余兄弟三人尚未析

箸余完婚後卽各爨輪奉菽水夫人性孝謹尤習操

作凡女紅及中饋事熟諳無遺晨昏視膳必竭盡心

力無幾微弗當先兩大人意周旋妯娌間惟敬惟和

事余長嫂猶事母。余爲諸生時。先大人督課甚嚴。每至文期。徹宵且不寐。夫人爲供脯羞。務極豐潔。恒脫簪珥佐之。比余僥倖一第。歷官四十餘年。謹守寒素。故我夫人亦依然裙布荆釵。自余爲中書部曹。及知府。兵道。歷任相隨。惟恐傷余之廉。一應飲食服飾。朴儉是崇。歲壬申。先兩大人皆登八袞。余時爲楚臬。欲乞賫捧差。歸里稱觴。會有兵事。未得請。夫人獨馳歸上壽。兩大人歡甚。余鞅掌仕途。每踈定省。賴夫人留家侍養。自是以後。不復隨任。終兩大人之天年。朝夕

承歡。靡有間刻。逮兩先人抱病。夫人虔奉湯藥。衣不解帶。目不交睫。以故兩先人彌留之際。兒孫繞膝。獨向夫人嘖嘖歎曰。賢婦若汝。真世所希有也。至于相余相敬如賓。老年倍篤。居平燕閒。見必起坐拱立。詢間饑飽寒煖。再三叮嚀。毋失時。嘗諄諄語侍妾輩云。我老不得追隨左右。汝曹當代我奉侍。萬勿拂其歡心。視庶生子女多人。撫摩鞠育。不啻已出。凡余父黨母黨戚屬。故舊歲時問遺。罔有缺失。從不以貧富炎涼。稍岐初終。治門內外。井井秩秩。肅若朝典。而御臧

獲輩。則溫然慈煦。寒燠勞苦。體恤畢到。年未四十。卽
虔奉竺乾氏。絕葷茹素已三十餘年。諸凡惠濟宗親。
賑施貧乏。卽囊空瓶罄。亦弗之吝。以至修葺道路橋
梁。莊嚴三寶勝事。爲德不可枚舉。甲申難作。南北間
阻。夫人痛余之厄。顛天長號。幾不欲生。繼而湖濱盜
賊蜂起。竄徙紛紛。獨夫人卓有定識。慰諭附近居民。
戒勿妄動。卒之雞犬不驚。一方安堵。已亥六七月間。
海寇突逞。遠近人心風鶴。余兒世濂。又公車來長安。
獨夫人在家鎮靜如常。窮以貼然居民交口誦

之。有女中丈夫之稱。夫人之明道理。識時務。有男子
所不及者。類如此。歲已亥。夫人患腹疾。兩目失明。余
爲陳情乞假蒙

先皇帝恩。允聞余之歸。驚喜疑夢。十載別離。一旦歡聚。
病遂霍然。兩目重明。其一。去年余假滿赴京。泣謂余
曰。感荷

聖恩。使我兩人白首夫妻。久別再逢。更復何憾。慎無以
我爲念也。嗚呼痛哉。不意其遽成永訣也。夫人享年
六十有七。叨沐

恩綸封一品夫人。迄不知其毳爲何物。金珠紈綺爲何用。其爲婦德婦行亦可想見矣。余哀楚中未能詳述爲狀。聊綴其概云爾。

祭貢士陸冰曦文

嗚呼哀哉。從來天道之不可問。而人事之不可知者。莫如才人弗獲以才顯。往往蘊其所蓄。偕腐草同痿。而善人弗獲享有遐齡。甚而欲易簣牖下。與夫妻子母一携手。而訣而不可期。嗚呼哀哉。此兩者皆人世之大可悲者也。天乎。天乎。胡爲萃我冰曦。以言其才。鎔今莖古。能文能詩。藻思雲流。奇字泉湧。彷彿乎機雲之可追。以言其人。入孝出悌。行矩言規。人喧我寂。人競我夷。族黨目以爲亢宗。而朋執欽之爲羽儀。戍

子秋試已合于主司尺度命之不辰既收而復遺及辛卯來貢于

廷。哀然高等。攷之選格。當除為李官。顧志期乎兩榜。益發憤以下帷。少司馬金公聞而賢之。俾其子若弟。執經問難。疑皆響答。問必實歸。甫旬日。主賓師弟。相得甚怡。胡天不弔。陡嬰二豎。遂致盧扁却走。參苓罔施。嗚呼哀哉。三千里外。白髮萱堂。方將聞

廷試之高等。而喜。又將聞館穀之得地。而喜。屈指秋闈。更擬倚閭望捷。而喜。詎意喜之忽變為感也。凡在遊

從無不涕泣而獻歎。况乎寡母弱妻與幼子。其能弗腸斷而肝摧。嗚呼哀哉。才人也宜顯而屯。善人也宜壽而促。天道耶。人事耶。胡為至于冰曦而雨。不可推。雖然。事理之難推者。自古如斯。冰曦終日。讀易明于憂患之數。其亦可以曠然于死別。生離。嗚呼哀哉。尚饗

長句用韻。數句用韻。此法自退之祭田橫來陸生。得此文可以為壽。陳百史先生評

祭岳父端所嚴公文

維天啓三年歲次癸亥九月戊子朔越九日丙申子
 婿金某謹以瓣香絮酒撫岳父大人之靈而哭之曰
 嗚呼痛哉翁何大斯而可以死耶。人生蠛蠓總歸一
 夢。夢有長而功名事業子女婚嫁無一不了者。可以
 死。夢有短而垂露在手。流雲過眼。百無一了者。亦竟
 可以死。乃翁則有了而不了者。若之乎。可以死也。翁
 年踰中壽。匪云天矣。然上有八袞之老母。煢煢在堂。
 顧翁所奉養惟虔。視飲食之進止為啼笑。覘顏色之

忻悴爲悲歡者竟勿克大展其孝思而溘焉棄捐此翁之不了者一翁玉樹盈堦行且聯翩鵲起匪莫傳矣顧翁之性資絕世爲時羽儀上而經史下及稗官野乘靡所不研以至揮毫洒翰咸羨鍾王再世米蔡比肩乃屈首黌序者三十餘載未揚眉吐氣一試其用而徒困于時命之迍邐此翁之不了者二翁之田園廬舍壘舊營新亦既有以蔭後而紹前矣顧翁自弱冠失怙卽秉家政大者撐持門戶里役細者綜核米鹽甕盎營營半生幾于疲精消骨廢餐忘眠而尚

有一女未字一子未婚如治絲者緒將半而終止焉此翁之不了者三嗚呼痛哉翁有此不了之大事三而可。以。死。耶。聞訃之日黃童白叟以及婦人女子無不咨嗟涕洟號慟欲絕是豈無因而然也蓋翁之爲人披肝吐膈無論賢愚而樂與周旋賑孤卹寡匪以爲俠而惟義是先又善解人之爭息人之鬪而親戚里黨咸倚重如魯連况與小子幸忝館甥翁之愛之也如子教之也如嚴師篤友予方未有以報稱萬一而一旦棄予長逝也能禁乎涕漣哉予所恨者翁之

疾匪不可療。而卒犯知醫不治之一言。嗚呼痛哉。今日哭翁之。日翁誕之。日也。謂宜偕予婦牽兒抱女。捧觴爲壽。而不意竟以此酒臨翁之几筵。予也有哀萬斛。有淚千滴。而不能起翁于九原之下。徒撫膺而問天。然予視兩舅。決能了翁所不了者。翁亦可以無恨于重泉。嗚呼痛哉。

祭內兄嚴叔韜文

嗚呼痛哉。吾叔韜兄也。兄年止五十七。少于我十有三齡。且稟質素強壯。胡爲乎嬰疾甫旬日而館舍遽捐。所生丈夫子五人。女子六人。纔婚其三。嫁其四。尚平之累猶半存。其全又胡爲乎脫然永逝。而忽遺少子幼女孤苦伶仃。致旁觀者目觸心憐。傷哉貧也。雖芝蘭繞砌。幸有先生可讀之遺書。而藐孤嗷嗷。竟無數畝可耕之薄田。將來其奚以供饘粥。支婚嫁而慰吾兄于九泉。嗚呼痛哉。吾爲之俯仰。歲時追維往事。

兄之肝腸興致宛宛盡在目前而愈不禁夫涕泗之漣漣當我之初為嚴氏館甥也兄甫七歲嘗偕汝姊歸寧飲食宴笑周旋不舍一如幼弟之事其長兄覺愛敬之油然及我叨列仕版每宦遊遠歸兄不艤舟維揚則必杖策錫山携諸交親具卮酒烹肥鮮殷勤款曲勞我于水之涯山之巔猶憶歲在癸未時余督軍昌平日夜驅馳戎馬中兄不辭險阻單騎來視相與促膝浮觴備極情意之纏綿繼余量移樞貳携手入都甫度歲而流氛孔熾烽火直逼幽燕我既執掌

之不暇兄亦歸計之如煎未幾京城難作兄舟遠抵臨清聞信輒撫膺長號度余之必死恨不北遡而言旋比余劇受賊掠濱死者數四卒愧未能一死以副兄節義期我之拳拳已而

皇清定鼎復慶余之再生因破涕為歡恒勸我以朋霞友煙至順治己丑歲余得請休沐兄逆我于毘陵道中恍如隔世重逢無日不肩隨而流連乃聚首方澹歲余又祇畏簡書而星言夙駕從此羈遲宦邸一別十年此十年中余凡七疏陳情順治己亥秋恩蒙

先皇帝報可。兄喜而逆之。無錫北關。綢繆繾綣。尤視昔有加焉。兩人瞻對。余固頽然老矣。兄少我十三齡。亦龐眉皓首。而頓削其顴。因歎人生百歲幾何。那堪十年一聚散。余是以不忍判兄之袂。兄亦懶策我鞭。居亡何。余又以王程嚴督。仍靦顏小草。不意去年秋八月。突罹兄姊之變。問疾視殮。兄皆代我仔肩。比余一聞訃音。籲請歸里。兄心傷。姊氏之不獲我訣。又幸余之撫棺一慟。悲喜交頤。一種懇惻。至情更難以言宣。嗚呼痛哉。兄之鬢雪齒搖。似乎較甚于昔。而笑語如

故。酒酣耳熟。豪情逸興如故。未嘗見有二豎之爲纏。今年春三月。同往曹村看牡丹。昆朋滿座。兄獨叫呼痛飲。斗酒一吸。咸歎謂年少弗如。豈料其已將辭世。而長眠。嗚呼痛哉。兄瓶無粒粟。囊無剩錢。而客至必欸欸必豐腆。興盡壺傾。始放客還。遇人有急難。爲之多方排解。卽罄典周恤。有所弗計。此又其慷慨之出乎。性天者也。嗚呼痛哉。易簣前一日。體雖憊而神甚清。猶執余手。出所服藥餌相商。未嘗以兒女子故。囑嚟一字。得無歸全。聞道而斬斷。多生來一切恩愛情。

緣也乎。靈如有知。來泣茲筵。尚饗。

祭亡壻沈階六文

嗚呼痛哉。吾壻階六也。自古皆有死。人孰無死而階六獨未可以死也。未可死而奈何。竟以死聞也。其夢耶。其果真耶。嗚呼痛哉。夢且不可而况乎。果真耶。謂年方強仕。功名未就而終其身。掩抑太學。竟賫志以歿。爲可痛耶。窮達有命。不足爲吾壻痛也。謂男婚女嫁。大半未畢。而一旦中道棄捐。徒以棼絲亂緒。萃之未亡人。一身爲可痛耶。修短有數。不足爲吾壻痛也。所痛者。上有七十三歲之萱堂。堅守五十餘年之苦。

節曾以婦兼子事其翁若姑曾以婦兼孫事其太翁
 若姑又曾以母兼父教其子又曾以母兼祖教其孫
 有如此之萱堂在上而奉養未竟慈恩未報其何可
 以死也乃因愛子之暴傷一慟欲絕遽罹不起之疾
 嗚呼痛哉太夫人曾代孫以哭其太翁若姑曾代子
 以哭其翁若姑今又以母兼父哭其子即行道之人
 聞之無不傷心酸鼻而况為吾之館甥者三十餘年
 也其能不撫今追昔為之嚮風而涕洟憑棺而長號
 也嗚呼痛哉

歲在辛未春二月時

余于是年四月內赴星沙備兵任嗣聞吾壻吾女琴
 瑟甚諧使吾夫婦遠遊宦所獲免內顧憂不意甫及
 暮年吾女遂厄產難聞吾壻當日之悲悼也甚于吾
 夫婦之聞訃摧肝然猶幸而舉一子吾壻見其子如
 見吾女因追念吾女益敬愛吾夫婦二人庶幾吾女
 雖死猶生也甥在即吾女在也又不意甥甫數歲復
 爾殒殤嗚呼痛哉至是而吾女其真亡也已以恒情
 處此鸞鏡重新螽斯別衍欲情文之纏綿始終勿替
 胡可得也乃吾壻之敬愛吾夫婦也一如吾女之未

嘗亡一。如吾甥之至今在。歲時伏臘。惠問必周。吉凶婚喪。慶賻罔缺。且不惟無忘夙好。而綣繆有加。更締新媾。又以繼配凌氏所生女。妻吾孫祖彭。卵翼之猶子焉。吾每出而宦遊。則必買舟攜樽。不遠數百里。祖送。每歸故里。則必迎勞如前。凡三十年如一日。辛丑秋八月十三。吾婦嬰疾長逝。時吾方滯跡長安。弗獲親視。舍殮。中夜刺心。聞吾壻躡踊致哀。與子無二。嗚呼痛哉。吾壻階六也。事母極孝。待親族里黨極厚。與人接物。極誠下。而御臧獲輩。極慈且恕。爲人若此。未

應遽死。有若節之萱堂。在上。未可遽死。而今竟死矣。其非夢矣。其果真矣。謂福善之天道。何吾惟有仰天。搥胸而已矣。嗚呼痛哉。雖然。吾壻雖未可死而死。然有丈夫子四人。孫男二人。必能代吾壻盡力于萱堂也。其亦可以瞑目于重泉也。夫嗚呼尚饗。

哀京兒文

嗚呼痛哉。吾兒京郎也。計汝之與吾相依。纔兩週八
月。有奇耳。遽以痘殤。嗚呼痛哉。汝生而聰慧。可人。廣
額疎眉。善笑語。飲食動履。與成人等。微獨吾與汝母
愛汝。汝兄若姊。愛汝。卽路人見之。亦無不愛汝。方冀
成長。以與我家。而今竟殤耶。其夢也。其信然也。嗚呼
痛哉。我出則汝問我何往。必目送我上馬。而後退。我
歸則汝問我何來。必含笑而牽我衣袂以入。及我偃
息齋中。涉獵文詞。則汝必叩門披幃。問我何爲。今我

金文通公集卷二十三
之出也。還顧馬前目送者，無有也。我之歸也，注視門內笑迎者，無有也。我之退而偃息也，側耳披幃叩問者，無有也。其信然矣。其非夢矣。嗚呼痛哉！豈愛汝者多，反致汝之殤耶？則汝何不生而醜劣愚駘，令父若母憎汝，兄若姊憎汝，執途之人無不憎汝，而少延其生耶？抑汝本應長命，而誤爲庸醫所殺，適符內典所云九橫死之一耶？嗚呼痛哉！于天乎，何怨于人乎？何尤反覆循省，實我之不德，有以促汝之算也。痛哉痛哉！自今以往，汝之形勿復令我記憶可也。汝之魂併

勿與我夢相接可也。我且晚，倘得請還里，汝隨我上祖先墳墓，祖父祖母在焉，必憐汝，護汝。汝其有所依而晨風暮雨，可免驚怖矣。嗚呼痛哉！吾兒京郎也。時順治六年己丑二月望日。

此豈讓韓子十二郎，李子寄寄文，耶子殤一子泣不成聲，乃夢先生與我同戚，竟有京公子之變，兩人官同心同而傷心事亦同，讀此泣下沾衣也。

陳
百史先生評

哭寶兒文

天乎天乎。我哭汝京哥纔幾日。而今又哭汝乎。嗚呼。汝與京哥皆我患難後所生。我思汝祖父祖母。每形夢寐。而十年不得一上墳墓。我思汝三哥世濶好學。能文。年甫二十一而歿。荏苒五年。而我不得一視孤。唁寡。我思汝大伯父。係我白首長兄。少嘗北面師事。之。不比尋常手足。今歿已三歲。而我不得一憑棺慟。哭我思汝嫡母在家絕葷茹。素虔修竺典。仍力督家。乘課子訓孫。亂離之餘。驚憂萬端。撫汝胞姊大姐如。

已出蚤暮未嘗一刻相離而我未得一歸慰問勞苦
凡若此者我之愁緒填胸而猶強開笑顏聊遣時日
藉汝與京哥在使我破涕爲懽也今一日相繼殤逝
天乎天乎誰爲解我愁緒乎汝年雖不及遇而聰慧
可人與京哥等每見我出門則必目送而號及我歸
家則雙手撲我懷中而嘻笑不置嗚呼今何在乎號
者嘻者竟杳不可得乎汝從此朝饑誰乳暮寒誰衣
乎抑汝與京哥兄弟相依得以無驚無恐乎顧獨不
念汝父若母眼傍

晨昏酸楚將何以開笑顏而

遣時日乎雖然誰實鞠育而使汝至此父母之罪也
汝何咎乎天乎天乎時

順治六年己丑三月朔日

如風雨中與骨肉語生死事悽惻不堪再讀西河
之痛正以一痛傳膝下有此人也又幸矣

陳百史

先生評

痛兒世湑文

嗚呼痛哉。吾兒世湑也。吾五十九歲生汝。今年七十有五。汝纔一十七歲耳。胡爲遽撇吾而逝也。雖少者。歿而老者存。世間恒有此顛倒可憐之事。獨念汝年雖少。而存心仁厚。發言循理。儼然老成氣格。遇尊長故舊。無親疎。必加敬愛。念貧窮孤寡。卽乞丐。亦生矜憫。下而御左右童僕。縱不如意。亦未嘗訶詈督責。卽兄弟子姪。尋常笑語間。亦從無輕浮刻薄之一字。宜乎非歿者相也。胡爲其竟歿也。嗚呼痛哉。汝于九月

二日從我上天目山猶奮足登臨顧視楓葉快未曾
有于初六日冒寒發熱遂抱病還家延醫調治巳于
九月念二日能飯我心喜甚因于念七日出門往鄉
掃墓不意汝于念七夜寒熱交作家人云宜亟追我
回汝正色止之云追必父驚且祭掃大典祖宗賴有
子孫者以此若因我病請還祖宗要子孫何用嗚呼
痛哉此真我孝子慈孫之言也汝平日敬信三寶猶
憶汝觀曇花酒菩提等傳奇卽羨慕其人其事嗟嘆
不置似于富貴功名了不介意者病篤時特請施鍊

師楊前譚道凡四書

語語會心初六早連問何時

師漫應以寅時汝曰我午時要去頻行盥漱果屆期
卽呼父呼母前連叩稱謝曰我去矣隨合掌念佛而
逝所謂正念分明捨報安祥者不是過矣嗚呼痛哉
此實爲父母者薄德累汝汝何以謝也我與汝明歲
完婚後到京授職將來年日長識見日進必能無驕
傲于人肯爲善于里爲我培養元氣爲祖宗綿行世
澤而何以竟付之一夢也嗚呼痛哉我反覆尋思畢
竟是我受親恩不能報受

君恩不能報受。

天地佛祖之恩不能報。浪擲浮光。虛糜家食。濫膺非分之福。所致耳。我是以和淚點墨。聊述汝概。盡餘生各自警。而且俾後之觀者。知汝之有道氣。無童心。實堪悼。非我之溺于舐犢而槩等之。為老年愛少子。則汝亦庶幾瞑目于重泉也夫。

告蘇郡城隍詞

神之靈爽。赫奕一城。賢愚貴賤。競凜威名。晦明風雨。禱祀雷轟。賞善罰惡。詎愆律令。百司弗逮。維神莫京。謂宜俗美。息其鬻爭。胡彼唾唾。惡習靡更。好鬪好訟。智力縱橫。誣盜誣命。產蕩家傾。報怨報仇。焚香矢盟。貪色貪財。告神而撓。凡若此類。實厭神睛。神豈弗怒。或俟其盈盈。則罰重。

上帝亦驚。敢告我神。報應速明。庶幾痴頑。震聾豁盲。善固知勸。惡亦心忤。革澆還醇。王道平平。

金文通公集卷二十三終

金文通公集卷之二十四

吳江金之俊豈凡著

講筵恭紀讚

臣之俊於四月十二日入直辦事。獲讀講臣王熙曹本榮講筵恭紀。因

上覽憲臣魏裔介疏。奏惡俗溺女事。深軫

睿。爰于講次垂諭。諄諄。臣捧讀未畢。不覺哽咽涕零。

仰見

堯仁如天。既憫惡習之忍殘。亟行法禁。又虞科條之顯督。遽難革心。欲使愚癡狼毒之氓。自動天良。翻然悔悟。一朝猛圖易轍。然後大愜。

宸慈至矣哉。

皇上之佑。羣生即文王之如。傷康誥之保赤。未喻其篤摯。而周詳也。謹拜手稽首而為之讚曰。

天作元后。綏厥蒸民。民罔常懷。懷於有仁。偉歟。皇恢弘胞與。胎麇卵。蟬罔俾失所。天親伊始。毛裏恩勤。

悼彼敝習。愛憎殊分。呱呱者女。馮夷在殉。何罪何知。殞生如瞬。匡俗有憲。煩寃宜伸。臚陳痛惋。以籲閭宸。帝曰吁哉。斯非細故。滅性傷倫。干

天渝怒。兵沴為厲。厥有其因。不忍宜擴。在予一人。思昔芳規。解網掩泣。每慮要囚。用深快悒。矧茲嬰孺。橫罹幽沉。梟獍未革。孰康

天心。須飭所。亟釐惡俗。怙終弗悛。何校莫贖。念彼蚩蚩。積染有年。戶曉匪易。曷望更茲。民盡有良。性迷斯隱。法禁雖張。忍端仍蘊。必使悔悟。滌乃錮愆。秉彝來

復

朕懷則宣。父子有親。匪假制令。保合太和。各正性命。

訓感涕大哉

王言。迪迷現性。拔

源茂對昌期。並生是欲天倫永

全弗萌。慘毒於皇

哲后。所寶惟慈。刑賞忠

咸本仁。推詎止天傷。幸沾帡

覆。痼瘵乃身。六合在宥。移俗易速。於郵巡功。瀾化

育。至治立臻。惟德動

天嘉祥降卜

天子萬年。無曆服。

關夫子讚

忠義之

昭日月正大之氣赫奕風霆心翊炎漢

功贊

天庭永護三教恒濟萬靈惠迪從逆罔逃聖聽千魔百

魁莫遁奸形分身塵刹呼醉使醒惟德晨輔家國用

寧。

姪女金氏苦節贊

有序

姪女金氏。余先伯兄心達公之長女也。祖達泉公。歷
粵中廉惠兩州別駕。治政有清白聲。心達公奉侍庭
闈。能盡子道。余先嫂沈亦以柔順盡婦道。稱于里閭。
姪女從母氏教。幼儀婉孌。治小學內。則等書。飭躬惟
謹。事父母祖父母。委宛承意。達泉公以長孫女。言辭
溫克。舉止有儀。甚愛之。年二十。歸于涓沮潘氏子。字
舜玉。諱國瑄。遊烏程邑庠。弱冠英穎。有文名。翁嘯生
公。官衛幕。豪于詩酒。晚歲家無餘貲。舜玉苦心勵志。

習舉子業。必欲一發得當。至精思嘔血乃已。年二十
二而卒。婚甫二年也。煢然一孤生。纔週歲。蕭條四壁。
所顧惟有殘書遺帙。幾無以謀其生矣。孺人撫育孤
子。自離襁褓。就師塾。以至髫年就試。皆從紡績織紉
中。供脯修之具。及子年長。文致翩翩。方幸後嗣成立。
以慰前人地下。乃竟二十而歿。嗟乎。二十年母子零
下。孤苦扶持。相倚已。謂人生之極難。迺復苦厄如此。
孺人真無以生爲已。又潘氏家。值中落。同堂伯仲不
能留其故居。孺人無一椽片瓦。惟有安工鍼繡。及舊

習詩書。數卷而已。幸姻戚之家。旣慕其貞操。挺持。又
敬其內範。雍肅。爭相師事。遂怡年館穀。擇宗屬爲之
嗣。以繼舜玉之後。慨然曰。自是得一弓地。完其宅兆。
吾事畢已。似此苦節皎皎。冰霜堪以砥。頽風而耀彤
管者也。爲之讚曰。

在昔共姜。守志而貞。伊惟陶母。翼侃以名。志堅則烈。
名成而榮。悲余姪女。運否獨下。初失所天。弱齡孳孳。
強食而食。以撫其嬰。績麻縫襪。佐此餘生。嗟哉母子。
身命相并。子復中歿。心摧骨驚。毀魄捐軀。夫又何營。

忍死再淹。以續螟蛉生也。弃捐死願同。瑩貞哉。秉志遠近。心傾有書在笥。閨塾是盟。無忝班姑。亢名東京。始或傾否。終焉後亨。企予望之。端在後英。

五人讚

天挺忠義。不于衣冠篤生。五人陡砥狂瀾。明季璫燄。善類幾殫。一二有心。目睨而嘆。舉國寒蟬。誰發其奸。緹騎縱橫。忠介被殘。五人義憤。瀝血披丹。誓不返顧。赴死如湍。博浪一擊。貞良始安。黨錮株連。實賴以寬。殺身成仁。義勇桓桓。爰旌厥墓。芳名弗刊。千載而下。憑弔聳觀。

附載批五人家屬手摺

憶昔五人以義憤殉烈。正余畏禍株連。浮沉外吏之日。弗克隨吾鄉好義諸老後。稍捐微貲。協助五家營塋之費。在苒四十餘年。物華代謝。義風凜然。

余自壬寅歲歸田以來。每過虎丘。輒于五人墓前。徘徊顧瞻。不禁嗟嘆。迄今墓木既拱。義氣鬱鬱。五人雖歿。而猶存也。因其家屬顏日裕等。以整葺墓道碑石為請。勉輸白銀四兩。聊資整葺費用。本宅樂觀厥成焉。

佟方伯待漏圖像讚

嚴恭寅畏。悚然而鵠立者。其趨朝之容也。夙夜匪懈。惕然而若有思者。其靖獻之忱也。我儀圖之。公殆有得于主敬之學者。歟。敬以立身。故關西四知。未方其清也。敬以治民。故召伯甘棠。未喻其惠也。從前由牧而守。而藩臬所至。見德所去。見思無非一敬之發。皇也。將來歷卿寺。而樞揆。而公孤。勩相國家。匡弼我后。無非一敬以要終也。惟其有之。是以似之也。

佟方伯小像讚

望之儼然泰華衡嵩卽之也溫冬日春風其砥躬也
希聖希賢其居心也午夜告天出而臨民如子得毋
所在見思龔黃卓魯凡齊趙晉豫幅員數千里之內
靡不家尸戶祝而爲之繪像立祠今福曜又照我吳
上紆司農之仰屋下拯窮黎之其咨固巍然爲江海
之柱石沛然爲

廊廟之雨露而奚止夫藩屏是司美哉左圖右史焚香
撫琴其仕而優則學者歟其學而優則仕者歟吾以

知天挺名世之非虛

又題

藹然春溫蒼生衽席皎焉秋肅巖廊柱石遊理學圃
聖賢標格登政事堂名世五百低徊仰止罕儔今昔

贈大中丞夏公像讚

端嚴其容坦蕩其衷挺然而屹立者勁栢蒼松藹然
而溫潤者膏雨春風生也非偶爰奮跡于從龍展矣
巨林遂領袖夫臺驄兩秉節鉞績高岱嵩遽賦東山
明哲推翁流長源遠厥嗣彌隆余固明徵之人事尤
默信之蒼穹

給諫王雪洲像讚

其骨挺然而清。其神儻然而遠。其于道味深之。益深。其于世味損之。又損。出入鳳掖。鑿坡之間。勿替讓讓。搜探白社。丹書之奧。直透關鍵。能用世而不之。混能出世而不必。遯吾何以測其爲人哉。再四思忖。信乎有本。

又題

是真是影。請自深省。非真非影。乃是究竟。比丘授記。固爲兒戲。道流示讖。亦恐相賺。求仙作佛。均屬髣髴。

何慮何思至人如斯

其骨聳然其神泰然其肝腸皎然其學識淵然十年
司計清勤罔替三次權關蠹弊全刪出入青瑣功高
袞補愛惜人材帝曰俞哉矢口福海聲震寮案我儀
圖之秘閣論思

給諫吳梅麓像讚

忘菴胡先生像讚

挺乎其骨。冲乎其容。深深乎其息。浩浩乎其胸。席榮華而若素。登陰德以山崇。擴大慈于含靈萬類。涌寶刹于妙明心中。有爲盡是無爲法。念佛却了叅禪功。卓哉世出真豪傑。乃在錢塘江以東。

安大參待漏圖讚

中夜以興具嚴天威其敬之見於容者也小心翼翼媚茲一人其誠之積於衷者也惟敬惟誠表裏相從由是而出身加民莊以涖之克樹無前之鴻烈無非誠敬之昭融也由是而敷歷中外網維軍國永播不朽之令聞一本誠敬以譽終也倚歟偉哉低徊仰止真百僚之岱嵩而翊運之人龍矣

大參安鑄翁像讚

其貌莊其骨剛其神清其氣英其衷坦其論侃其學

富其識透敷政臨民。盎然而春。察奸摘幽。肅然而秋。嘔心于戶口。愉悴之關。怡情于琴書。蕭曠之間。洵哉經濟文章。兩擅其長。而國恤民瘼。並借爲良藥者歟。吾不能竟其德業之無前。與夫位望之陟巔矣。

臬司羅約齋像讚

其儀端以肅。其神靜以穆。其學淵以蓄。其才弘以速。騰譽花封。聲徹九重。敷歷外中。赤幟文宗。轉餉投醪。徧滿恩膏。亮節冰操。分權名高。總憲兩淞。來暮思切。壘助截嶠。佇登魏闕。有琴自怡。有花自嬉。我儀圖之。冠冕百司。

塗衡宇先生像讚

文山峻聳學海汪洋。汎濫乎經史百家之籍。沉醉于
鍾玉米蔡之場。匪獨馳聲藝苑。抑且飭志綱常。其秉
正疾邪也。皎日秋霜。其燕翼貽謀也。弧矢縹緗。雖才
高和寡。困頓于昧目之有司。而福善降祥。天道彰彰。
不發于其身。卒發于其子。若孫而繩繩振振。彌熾彌
昌。嗚呼。不名而名。不壽而壽。公又何憾于彼蒼。

塗雲鵬先生像讚

我然而矜莊者。我以彷彿其視身之容。藹然而雍和者。我以想像其與物之風。凝然若有思。淵然其不可殫究者。我以窺其龍韜豹畧。直與孫吳比肩。頗牧齊蹤。至于生平大節。炳炳烺烺。昭史冊而垂金石者。本于至性。移孝作忠。宜其德厚流光。根深枝茂。天道人事。呼吸關通。是以膺福祚之綿長。裕後昆之豐隆。

金浩然像讚

質樸其顏。蕭疎其宇。峻嶒其骨。坦遂其腑。束髮從戎。有力如虎。聿展韜鈴。頗牧爲伍。抗志高舉。雲霄縱羽。麟閣勲名。不顧而吐。淋漓於翰墨之場。沉酣于六藝之圃。鍾王今比肩。馬董今接武。赫赫焉技擅一時。漠漠焉神棲千古。未嘗以瓶罍興嗟。或因而受憐。取侮其真。大雅之君子。而可騷壇之旗鼓者也。

毛休文像讚

其貌冲然。其神悠然。任聲色。利名。交于睫。而莫能撓。其天聽。毀譽。是非。飄于耳。而不與之俱遷。一心曠兮。若谷萬事。聽其自然。致虛守靜之學。持志養氣之傳。若其泛濫經史。跌宕詩文。則又傲千古。雄萬夫。而一時之號學士才人者。又鮮與之比肩。伊何人哉。我儀圖之。休文有焉。

再題

人情嶮巇。惟君平之。世風叔季。惟君古之。利名火猛。

金文通集 卷三四 讚
君能水之愛欲海深。君能涸之以之入世。和光同塵。
以之出世。佛乘仙真。低徊瞻顧。型範千秋。何幸吾生。
目擊高流。

金孟升像讚

藹然者其容也。坦然者其胸也。粹然而無疵者。一生
之踐履也。皎然而不欺者。午夜之盟心也。洵哉篤行
之君子也。宜宗族鄉黨之無間言。而孝悌忠信之足
以法。今傳後也。又何必軒冕之爲榮。神仙之是慕也。

彭蒼侯像讚

其貌癯然其神泰然囊無一錢貧不受憐六書精研
義猷比肩三藏流連不緇而禪溷跡市廛希踪聖賢
知命樂天庶幾似焉

心達伯兄像讚

兄之生也長余十九雁行多人兄實居首紡學辛勤
數奇不偶未嘗怨尤陶然飲酒從晨至宵必傾數斗
雖遊醉鄉天性獨厚菽水承權匪徒養口人無間言
嫡繼二母友于諸弟不分前後痛念先塋築舍日久
自號心達頽泚引咎茹素啣悲精血爲嘔畢力經營
襄事一手蔚焉松楸閔曾無負勞瘁用殫僅踰中壽
百行首端洵足不朽

潘現亭像讚

吉凶災祥有其機而有目者恒不見機得喪存亡有其理而能視者或多昧理良以心爲目役則目反障心也若夫潘君現亭無機不燭無理不徹而以一易薰天下之迷津其真視不以目眼不關視而可謂眼根圓通者歟吾故表而出之以媿彼雙眸炯炯者焉

顧仲書像讚

不必推之曰儒而六德六行之兼備蔚然爲儒林宗
不必高之曰禪而無掛無礙之胸次蕭然有老衲風
亦不必折衷儒與釋之間以概其生平而世出世入
之綽綽有餘吾以知夫脫冠露頂執玉跌坐者蓋具
大圓通也

閔少江像讚

其體豐其氣融其存心也正中其制行也恪恭其渾然而泯町畦也未嘗人我是封其介然而絕詭也也未嘗涇渭稍樂善者人心之同宜乎令名之播聞無窮福善者天道之公吾以下其子孫之彌熾彌隆

蔡長卿像讚

睟乎其容。坦乎其胸。沉酣于五經六藝之圃。遊息于
道德仁義之中。無爲無欲。絕羣嗜之外。攻不愧不作。
惟一真之內融。允矣先正典型。富哉後學陶鎔。然則
其近紹者。西齋之家風。而所遠尋者。孔顏樂處之是
宗歟。

孫霓橋像讚

樸乎其貌。坦乎其胸。視榮利之若浼。能委順以春容。
有時吹鳳簫于月夜。響徹霄穹。有時飛羽觴于花前。
座滿春風。非掛名於釋氏。似得道之仙翁。况有子而
文且賢。吾益信福善之天公。

沈仲明像讚

蒼爾顏。壯爾年。戟爾髯。率爾天。心無傀儡。滿座風生。
口絕雌黃。妍媸鏡明。其爲技也。能絲能竹。能肉。其爲
人也不鄙不貪。不俗。世盡目之曰逸流韻客。吾直號
之曰正士端人。

沈仲明雙壽圖讚

誰無夫婦罕覲賢耦。同齒同心。如鼓瑟琴。既勤且儉。能免驕詔。梁鴻孟光。甘苦共嘗。芝蘭遶砌。聿彰善繼。垂裕堂中。如日方東。有酒盈樽。一任我吞。

張子遊像讚

繕寫照併山水人物

其貌温良。其品圭璋。言動有則。技能無匹。下筆寫生。造物賦形。能動鬚眉。疑作咳嘻。觀者絕倒。尺幅如寶。雲煙林麓。無不奪目。倩女嬌娥。令人風魔。僧繇虎頭。詎足與侔。歛毫靜對。尤堪敬愛。胡不自貌。恣我叫笑。

朱化凡像讚

余辛酉歲卽交先生時居湖濱名已雷轟嗣移震澤
益閎厥聲聲旣洋溢卜居蘇城三吳紳士靡不心傾
義文周孔寤寐來迎吉凶悔吝洞如鏡明嘗與余談
奧義縱橫管葛退舍程朱遜勅匪探象數理學主盟
略傳緒論通國皆驚一。生品行聖賢與京宜乎有後
繩振蜚英余交最久追憶涕盈欣覩賢胤天道衡平
千載而下今聞錚錚。

沈朗仲像讚

藹然而可親者。其纖蒂不留之坦胸也。條然而自遠者。其萬緣俱淡之高致也。我儀圖之。庶得其天。慈容道貌。亦佛亦仙。篤行純衷。希聖希賢。遊戲岐黃。活人萬千。沉酣圖史。逍遙大年。我亦緣深。晨夕周旋。中心傾折。實無間然。

臬長劉公像讚

正直其身。端凝其神。小心翼翼。媚茲

一人。嚴裝待漏。夙夜惟寅。敷歷中外。見聞欲陳。佩玉鳴鏘。丹悃是伸。

天王慎獄。欽恤惟仁。爰簡國楨。秉憲江濠。惟公膺

敕。布德無垠。五聲聽訟。審克攸均。明刑弼教。犴狴皆春。

哲人惟刑。法天相民。于公歐陽。今古比倫。外臺綱紀。

肅焉聿振。聲實宏茂。竚達

楓宸。銘鐘勒鼎。麟閣圖真。

張公琰小像讚

樸爾貌當爾胸。師黷石友。赤松利欲禍患。不驚其神。
 煩惱妄想。不滑其真。其天既全。其福自綿。信仁人之
 有後。豈理數之。或謬伊何人斯。張子有之。

趙參將像讚

天挺偉人。子龍華胄。鷹騫奮跡。峨眉毓秀。三略夙嫻。六韜秘授。蠢彼樓櫓。跳梁隙竇。揮戈躍馬。殲渠功懋。何乃渝東。遺孽復訐。我武維揚。巴峽從風。

親藩奏續。聿紀元功。

帝曰俞哉。錫爾彤弓。勞勩累積。克儲元戎。東南要區。于城特寄。矧此金閭。根本重地。東伍惠民。外寧內乂。正笏垂紳。麟閣呈瑞。我儀圖之。雲臺首誌。

方伯羅約齋像讚

湛然而澄者其人也。倏然而宏者其氣也。方圓竝畫。左右逢源者。其剗繁理劇之長才也。焚香告天。讀古自怡者。其盟衾知影之心事也。令所至地方。甫歌來暮。又切去思者。昔日之江南。而今日之兩浙也。

聖天子方軫念民。窮慎簡督。撫俾民生樂業。立睹收寧者。舍我羅公。又誰與歸也。

張鄰曾像讚

溫粹其容坦蕩其胸力學績文探奧典墳才高數奇
百里是司仁心惠政民倚爲命孝養是耽亟謝組簪
歸維琴鶴進退無忤讀書味道塵俗一掃邦之儀刑
天之景星年登古稀神仙其姿伊何人哉紹往開來

胡祥甫像讚

穆然而靜深者其道貌也。冲然而和粹者其制行也。抱朴子之金匱秘冊。靡有弗探。孫思邈之龍宮禁方。無所不究。起危疴而立應。爽神術而不矜。我儀圖之。伊何人斯。其殆挾岐黃之奧。而還存聖賢利物之心者歟。

金文通公集卷二十四終

金文通公集卷之二十五

吳江金之俊豈凡著

佟公寄園玉蘭再花頌

古今草木鳥獸之瑞表異著靈者莫不形諸歌詠載
任簡冊匪重其物重其人也其人周召其棠喬木嗣
響金石矣其人韓范秋霜春露萬彙昭蘇矣惟我佟
公軼駕范韓方軌周召自奉

簡命承宣大江南北。八載于茲。凡所以蘇民命而培國脉者。徽猷美績。如萬花齊發。四時皆春。乃民無以繪其德者。物有以呈其祥。寄園中之玉蘭再花。有以也夫。爰爲之頌曰。

猗與長夏。爛彼春葩。瓊英紛吐。半載兩花。雨膏流潤。棠蔭交加。和氣祥徵。慶叶邦家。

題畫鳳凰頌

天地人龍。韜略填胸。昌期適逢。雄鎮江東。廉勇樹庸。梧鳳高蹤。勒鼎銘鐘。存膺侯封。

端硯銘

爾體則端。爾用甚圓。毋導匪僻。磨礪聖賢。毋沾俗趣。
 點染雲烟。毋溺功利。性命是研。毋流殘刻。仁濟為先。
 凡有施為。必求問天。當其退藏。百世千年。以是號端。
 名實乃全。

古硯銘

任墨君之環攻。磨而不磷。恣穎生之點染。涅而不淄。
 用有萬變。體則如斯。功多勿伐。名成勿尸。惟靜惟樸。
 爾壽允宜。

見道 陳百史先生評

筆銘

植幹文山。英髦輻輳。爭名藝苑。針芒迸逗。周情孔思。惟爾是資。勒鼎銘鐘。惟爾之庸。勿傳簧舌。以之誣民。勿淬錐鋒。以之殺人。慎韜爾穎。庶免屈撓。墨海涵星。任爾逍遙。

與子瞻先生硯銘同

陳百史先生評

几銘

有几橫窓。織塵勿容。瞬息萬古。往來心胸。質厚而坦。與聖賢伍。端且潔兮。焚香夜午。

更絕佻巧

陳百史先生評

扇銘

君子之德。惟汝有之。陽舒陰卷。與時推移。左右圖書。騷邪盈握。出入懷袖。自矜稜角。

和平

陳百史先生評

鉛梳銘

有引

有友人來自金陵。語余烏鬚方盛。誇鉛梳。凡鬚髮皓然者。一梳輒黑。一黑便可百日。再梳復黑如常。士夫之欲仕達者。老婦之冀悅其夫。衰翁之思悅其少婦者。爭相傳購。如獲波斯胡。變亂黑白。迷誰老少。不經殊甚。余感而銘之。

爾質類鐵。能柔剛而爲櫛。爾性非墨。能變白而爲黑。爾濁亂于仕途。鐘鳴漏盡而不息。爾周旋于房闈。膏枯髓竭而猶餘。無望爾之疏滯而通。理焚而戢。先懼。

爾之亂。是而非矯枉爲直。清仕路者。在所必黜。珍餘生者。尤宜痛疾。聽其自然。萬事已畢。銘之座右。徧告有識。

火樹銘

有小引

崇禎辛巳。余備兵南州。節屆上元。雨雪雜下。凝樹成冰。攷之爾雅。雨雪雜下曰霰。又劉向五行傳曰。霰者陰脅陽也。時燕趙齊魯。則土寇肆螫。秦豫楚蜀。則流氛逞燄。惟江浙之間。稍有寧宇。而又以年荒穀貴。民不聊生。所在沟沟。茲災沴復見于歲首。變不虛生。良可畏也。兀坐荒署。悶極無聊。因命童子截竹爲筒。作花火數樹。以舒悶懷。而戲爲之銘。其形堅其性直。愧紙上之空言。依君子而爲質。有膈

金文通公集 卷二十五
必吐無腸。或匿如泉。斯噴如雷。斯擊如流星。皓月之
乘波而亂。如千軍萬馬之潰圍而出。志本期乎冲霄
匪風雨之能絀。氣勃鬱乎萬端。凜光芒之難逼。豈曰
良宵之爲玩。今彷彿乎直臣之叫闈。無路而仰天。奮
激宜羣兒望之辟易。而衣冠亦以動色。

酒算子銘

爾質精堅。爾珠便嬛。不計錙銖。不較圭撮。與韻客兮
盤桓。向樽前兮活潑。不知爾者。以爲錢神之僕。隸其
知爾者。直以爲醉鄉之會計。一升一斗。一石。非爾不
覈。有花有月。有雪。思爾更切。

又

呼爾之號俗。不可療。錄爾之功。引人洪濛。太白酒樓
屢借。前籌無功。醉鄉旗鼓高張。一織一塵。從未勞神。
斯倉斯箱。更弗縈腸。花明月皎。呈能愈巧。孤館殘更。

周折多情。洗盡俗氣。惟存豪氣。換盡俗胎。欲結仙胎。倚歎休哉。令人肩開。

附息齋算酒記

東海年姪宋琬撰

太傅金公致政里居。傲陸賈大夫遺意。分命其子若孫。更番進饋。戒勿得過五簋。雞鶩羊豕魚鱗生介之屬。不以入庖。顧獨於酒取旨焉。鄉大夫以下。無論少長。相率為一品之會。後至者罰。客既集。童子以二算子置几上。公手執其一。而以其一授典客。先校賓主之多寡。次視其飲量之廣狹。俾自承也。曰某也能盡一石。某也能勝幾斗。其不任杯勺者。左右代為之飲。哀益既定。分為東西二曹。而聽令焉。令用骰子六枚。準古臬盧之制。以若干擲為限。每勝采一算。酒十觴。自十而百。自百而千。累進有加。毫釐無爽焉。限既盈。公曰止。乃飲西曹酒。而授之算。西曹長擲如限。計其奇贏而進退之。如東曹勝采千。西曹僅得八百。則合飲正二百觴也。

其或西曹勝采。浮于東曹若干。則東曹飲亦如法。而公亦握算再復之。如是往返數四。座客皆專心傾耳。惟恐錙銖之或謬。以故稠人密坐。寂然無譁。參橫月移。雖少年壯盛。往往有逸去者。而公方踞牀呼白。目睽睽如巖下電。余於是乎退而太息。知我公寓意之微。雖一飲酒。間而型家範。俗之美。存焉。蓋非徒觴政之善而已。漢陰丈人之言曰。有機事者。必有機心。算子機之最深者也。仕宦則算名於朝。商賈則算利於野。莫不鐵心鉢腎。朝觚夕籌。一瞬息間。罔肯遺策。王戎以之營家。而遺譏青史。安石以之經國。而流毒蒼生。且夫分曹列偶。角立之象也。三爵不識。爭呶之具也。我公以嘲風弄月之餘暇。示投壺拾決之雛容。溫室之樹無言。側弁之愆弗作。猷猷夜飲。不醉無歸。此殆平泉午橋未足。髣髴其高風而香山至道諄諄以年位相矜其視。公為何等也。昔何曾日食萬錢。猶日無下箸處。公之不問家人生產。而傳食家庭達矣。然而豆無兼味。門乏綺紈之隸。又何儉也。

今天子銳意昇平。思得黃髮壽考之老。秉持鈞軸。而公精神矍鑠。纔如五十許人。其盤舊學。且夕將有安車之召。則其出而平章天下也。有如此算矣。公嘗自為二算銘。士人爭傳誦之。今吳門好事者。競做公所為。以行酒。以公嘗居曹村。因謂曹村令云。

我箴 有小引

先正有言。我字兩戈相向。最不可有。若我也。最難克者亦我也。息齋讀而瞿然曰。孔子毋我。釋迦老子曰。無我相。文始真人曰。道無我。我之不可有也。三教有同然哉。爰作我箴焉。

五濁世。遍地戈矛。我為之伏。多生來。一切怨對。我為之蓄。欲得怨對冰消。戈矛偃伏。須是斬草除根。莫教藕斷絲續。去一我。三教足。

普同塔引

東坡之銘暴骨也。曰是豈無主。仁人君子斯則其主矣。噫。此真仁人君子之言也。從來掩骼埋胔。食報不淺。而世人鮮留意于此者。良以黃金能語。白骨無言。與其施恩不報之地。何如市德必償之人。于是著慳貪想者。徒飽自己膿血。卽生布施心者。亦遑顧誰氏枯顛。不知羈魂旅魄。飄泊堪憐。暮雨晨風。凄傷欲絕。王恂之墓客舍書生。陳元之瘞饑歲萬殍。稽之往牒。因果昭然。世間容有負心之活口。地下決無背德之

金文通公集 卷三五
灰骸爲之主者。緊惟仁人君子是賴。余伯兄孟然先得我心。慨然首倡義舉。欲建普同塔于潯鎮之隙地。而比丘某踴躍贊助。誓共圓成。若自作。若教他作。見作隨喜。伯兄與比丘之謂也。伯兄曰。人之欲善。誰不如我弟。其爲我廣之。余因書此以徧告仁人君子。

潯水普同塔疏

曹溪西去數武。爲南潯鎮。有報國寺。南林上人曾斷一手以誓興復該寺。至今機緣未就。然爲法忘身一念。何異斷臂之神光。余素嘉其真心實行。庶幾其無我相者乎。一日持疏冊。欲建普同塔于寺之彌陀閣後。而丐子言爲勸。余不禁撫掌歎曰。善哉。普同塔之義大矣。哉。衆生流浪生死。靡有了期。皆緣不普。不同。一我相爲之根也。我之爲相。不啻山高難摧。海深難涸。我痛我癢。我苦我樂。我饑我飽。我寒我煖。我自知

之若他人之痛癢苦樂饑飽寒煖則我不知也知則于我不勝其愛護愛護之至因而積過無算不知則于人不勝其漠視漠視之甚因而造孽無邊有能明乎普同之義則現前蛻骨盈墟塞莽于其中求一分別之相了不可得欲不發普心不作同觀又寧可得也既普既同則我山自摧我海頓涸無聖無凡無古無今無不團圓相見于大光明藏中至此而後生死根株兜底截斷矣故曰普同塔之義大矣哉余所以嘉南師之誓願而不能已于言也若僅僅以掩骼埋

齒澤及枯骨之勝因爲之讚歎勸施則視南師之願甚淺而余言亦贅甚矣請質之諸方明眼者

西天王寺募建普同塔地藏殿疏

余之爲普同塔募疏者。不知其幾矣。大約募主雖異。募義則同。無非以磷磷白骨。慘慘青熒。爲毒霧辛霜之所飽嚼。酸風淡月之所盤旋者。皆我過去之六親。未來之郵舍。與現在之影像也。一回首轉。腦間自有令人坐視不忍者。雖募義之闡揚。似已什得八九。未免有筆枯墨鏤之憾。歲在戊申夏。有西天王寺僧定澄。欲于寺傍隙地募造普同塔。隨建地藏殿。廣度幽冥衆生。屢促余一言。而未有以應。定澄曰。居士蓋嘗

爲普同塔說無盡義者也。今于西天王寺獨斬一言。豈普者同者如是乎。抑不普而普不同而別有第一義存乎。請居士速道。余唯然曰。應如是。普應如是。同無邊刹海。自他不隔于毫端。十世古今始終不越于當念。不普而普。乃真普矣。不同而同。乃真同矣。因書其冊以歸之。

吳江北門外三官殿募建普同塔疏

普同塔者。卽古先王澤及枯骨之善政。與夫仁人君子瘞饑殞旅。掩酪埋胔之慈心。陰德推而廣之者也。余爲普同塔疏勸者。不一次矣。茲江城北郊遺骸委積。有一行僧廣募善緣。建塔于三官殿之傍。而復乞言于余。余不覺愴然有感曰。天地間世界無盡。衆生無盡。凡此燐燐白骨。亦與之俱無盡。總之地水火風之所和合。倏聚倏散。成住壞空之所遞遷。頻往頻來。安知非我多生眷屬。曾飽悽風慘月。于其下又安知

金文通公集卷三十五
非我無量劫來亦嘗舍生受生如郵亭傳舍于其中而能不目睨心摧忍置陌路也然則此普同也不當作沉冥衆生堆墟委莽之普同觀直當作諸佛菩薩一切平等團圓相見之普同觀有不歡喜讚歎而爲之協力圓成亟種此良因乎余是以不禁饒舌而復疏其緣起如此

善緣菴疏

方今民窮財盡淫祀非所尚也而有能捍患禦災則祀之此禮所著也崇禎十年冬吳城之沙淥地方有一佛像自西浮水而至泊一石丁間經數晝夜波湧濤翻不移分寸居民異之因誅茆爲軒焚香致禮焉此猶村夫里婦神道設教之俗見也越明年大江南北飛蝗蔽天傷禾稼無算居民惶懼不知所出相與語曰試禱之西來佛像或者護吾一方未可知也焚祝之餘仰視飛蝗倏忽散去卒無害稼衆皆踴躍鳩

金文通公集 卷三五
工不日菴成。顏之曰善緣。佛之緣有以鼓人之善。歟。抑人之善有以感佛之緣。歟。事固有不期然而理則有必然者。歟。卽禱蝗一節之靈應。佛之垂慈護佑。當未有艾。其或者歲亢旱乎。必且禱雨而雨降。其或者歲淫潦乎。必且祈晴而潦止。夫使邑有賢侯在上。而蝗螟水旱不能爲之災。我儕之尸而祝之。當若何而木偶之。佛像具是功德焉。其何可以弗祀。余是以歡喜樂道其事。且以見邑人喁喁望歲。欲旦暮賢邑之意。

答李大司農書

俊浙江嘉興府嘉興縣籍。直隸蘇州府吳江縣人也。蘇松等郡則五年一編審。浙西等郡則十年一編審。年來役法之弊。壞飛詭之濫。觴大約吏胥爲政者。十之八九。花多爲少。詭有爲無。役之輕重。全不照田之多寡。於是出殷實。說懸坐重役。有乘機射利者。有借端報復者。下不顧百姓身家。上不顧朝廷公務。俊目擊心傷。不識忌諱。冒杼臆見。干瀆天聰。幸荷聖明洞鑒。下之貴部看議。台臺向年節鎮東南。曲軫民隱。

役務一節。尤素所留神。以惠顧東南之盛心。出爲久長無弊之石畫。當無俟後之更贅一詞矣。乃復承手檄下頌。詳悉開示。具何台臺體國恤民。至虛至公。敢不有以復明諭之及乎。免例品級。浙西與吳郡不同。浙西田窄。免例亦窄。吳郡田寬。免例亦寬。昔年徐簡吾老公祖。裁定免例。至今尚存。朕今日時勢。似又不同於疇曩。賦役日煩。民生日蹙。聖明在上。又軫恤小民。倍至恐。昔日之免例。未可據以入告我后也。伏候台裁者一。說者曰。貧民之數畝。豈堪與什百畝者共

派役銀。不知數畝之田。欲安頓甲下里長。要錢。扇書要錢。每畝不下錢計。今若俯從未議。無田不役。則每畝多不過壹分。少不過半分。收壹擔之入。而爲壹分半分之出。不猶愈於里扇之橫索乎。且零畝不幫。則又大開花分之門矣。伏候台裁者二。說者曰。貼役之議。見今行之。副役曾不破壹文。是以告者過也。俊據吳江一縣而論。共田壹百拾叁萬畝。零。除去鄉紳舉貢監儒雜職等優免而外。每冊以肆拾萬畝作空役。每畝輸銀壹錢。約銀肆萬兩。近來都供別項支用。半

飽吏胥谿壑。特未曾分毫給與當役之人耳。今若俯從未議。某項重役該幫若干。某項輕役該幫若干。咨行撫按兩臺。行令各府州縣。斟酌至當。著爲定例。須要實實給與當役之人。更不得借空役名色。那移別用。又何慮其有幫役之名。而無貼役之實也。伏候台裁者三。總之吳會與浙西。各府之情形不同。而小民之苦累相似。俊一腔癡愚。但知從朝廷起見。從百姓起見。此舉實府怨非沽譽也。所恃台臺之精白。乃心上媚一人。下軫萬姓。必不爲旁議所淆。故敢畢抒狂瞽。仰副咨詢。統祈台慈照宥。

又答李大司農書

俊再捧台機蒙下詢鄉紳優免一節具初台臺慮終
謀始期於萬妥萬當一片惠顧小民之盛心與扶植
衿紳之厚誼勃溢楮墨間敢不再布愚衷仰佐採擇
竊以爲當役與幫役之義有二當役者如百畝之田
卽當百畝之役所謂庶人往役之義是也幫役者多
則每畝幫分許少則每畝僅數釐所謂衆擎易舉之
意是也鄉紳而免其力役已叨朝廷優厚之典鄉紳
而一體津貼正爲四民好義之倡免則不妨於幫幫

亦仍不礙夫免至於優免之多寡應否遵照會典限制而稍爲變通應否酌量地畝寬窄而相機裒益是在台臺挈其大綱毅狀主持於內咨行撫按兩院析其端緒徹底清釐於外使小民無不平之鳴正所以厚鄉紳使鄉紳有好義之實乃所以報君父台臺之爲此舉也江南億萬姓當子子孫孫生生世世祀高厚于無疆豈磨崖勒石所能紀其功德哉總之是畝均幫則幫之爲費甚省不獨零戶便卽士紳亦便若有幫有不幫則避幫之法百出不獨花分依舊卽詭寄亦必依舊役之均也其何日之有屢辱虛懷下詢忘其冒昧統祈裁察施行

上韓撫院書

敬啓法立弊生。自古所嘆。蓋嘆奉行之不善也。然或利多害少。或利害相參。未有奉行全失其指。致良法美意。反以便民者。害民如邇來保甲長一則者也。向爲居民現總之役。一切差徭勾攝。往來承應。無不責成現總。波累多端。蒙老祖臺軫念地方。洞悉疾苦。徹底革除。憲諭煌煌。萬姓歡呼。止有逃人一項。遵督捕刊行則例。立保甲長爲之稽察。其餘槩與保甲長無涉。不意年來奉行者。不仰體老祖臺愛民至意。反借

題誅求一應地方大小事件。悉攢累保甲長。公差紙票。絡繹糾纏輪值之家。如遭橫禍。因而有力者百計賄免貧弱者坐待淪胥。四境囂然。如坐湯火。其害有甚于居民現總舉老祖臺一片愛民血誠。竟爲舞文亂法之奸蠹埋沒殆盡。治某目擊痛心。不覺啣指頓足。伏乞迅發鈞示。立行禁止。仍嚴檄郡邑。恪遵初頒禁約。革除近日苦弊。庶不負我祖臺昔年立法初心。而闔郡之家戶。祝早暮頂頌。又寧有旣也。尚此力疾額陳。統祈垂鑒。顯候德音。曷勝翹切。

議除現總十苦

謹議爲恤民不在紛更。甦困在于剔弊。謬陳芻蕘。仰備採擇事。竊照在城內外。畷民輪充現總之役。現年一年一轉。總甲四十五日一輪。最煩重者。莫如逃人一項。次則人命盜情火發。封刷船隻。過往緯夫。造船鑛夫等項。其瑣屑者。不堪枚舉。事無巨細。皆現年總甲之責。力不能自身充當。勢必倩人包攬。名曰走畷。遇有逃人等事。百計恐嚇。儘費儘騙。卽承值瑣事。大小衙門差役。絡繹呼喚。事事要錢。宜乎民生日瘁。畏

役轉甚其苦累誠有難以殫述者。蓋何來現總。因本身不諳役務。僱地方之貧而耐勞者代當。現年貼役五分。總甲貼役一錢。每日總計不過一錢五分。資其口食。以供奔走。答應官府。今現年總甲。盡屬積棍包攬。每日貼銀五錢。鬧市倍之。既已安享肥利。尚欲見事生波。串通衙役。兜攬說合。百計索騙。倘遇有重大事情。竟自遁去。正身受罪。費則盈百盈千。殉以身家。嗚呼。民當役之苦。約略如此。乃近日奸胥。啗棍復朋謀。構局倡言。市廛間架起役。名爲居民總甲。沿門科派。

事未舉行。費已不貲。宜乎居民之驚惶罷市。此紛更爲害之大端。斷斷乎亟行議寢者也。至於嗚民現總之苦。委宜加之軫恤。有可以因事節省。徹底清釐者。除得一分。則小民受一分之惠。無論本人自當。僱人代當。總不至于畏如湯火也。謹條列如左。

一稽察奸宄。東人自有四隣十家長舉首。若四隣十家長通同容隱。或經官府發覺。或被傍人首告。則四隣十家長自有連坐之律在。何必現年總甲代報。日夕擔不測之憂。此其苦之當除者一也。

一人命自有屍親告理。兩隣干証質對。乃以申報責之。無干現總。無論真偽。應管人命之衙門。要報。卽不應管人命之衙門。亦要報。以至籤票星飛。狼差蜂擁。一家干涉人命。闔城爲之鼎沸。甚有居人命爲奇貨者。護兇身。則嗔其以假報真。護苦主。則嗔其以真報假。報假報真。其害總歸于正身現總。此其苦之當除者二也。

一。箇內失盜。自有失主。併兩憐呈報。聽官府差捕訪緝。何必責之現總。報強報竊。報多報少。一有錯誤。總之正身現總受累。此其害之當除者三也。

一。封刷船隻。應付小差。自有埠頭承值。遇大兵經臨。必須巨艦。卽有司親自封捉。尚苦勢要奪回。辱官毆役。付之無奈。責之區區現總。何敢與抗。此其苦之當除者四也。

一。封過船隻。自有原差管押。大者交付埠頭。小者立時押進城內。何必派現總看守。一有脫逃。需索百般。此其苦之當除者五也。

一起解東人。自有壯丁逐程押解。沿途有各府縣

汛兵接替護送。何必派及現總索費紛紛。此其苦之當除者六也。

一城內失火。自有兩隣舉報火頭。乃一槩責現總。儘有住居寫遠。甚至城內城外相隔者。申報稍遲。官差立至。罪與火頭等。此其苦之當除者七也。

一經過差使需用絳夫。自有官發錢糧僱覓。何必責之現總。有夫無夫。折多折少。害貽正身。此其苦之當除者八也。

一造船需用牽鑽夫。槩派現總。日逐拘拏。往往造船未完。折夫乾沒無算。此其苦之當除者九也。

一几修葺各衙門。需用各色匠役。自有當官匠頭承值。該縣工房支應。一槩責之現總。要磚瓦。要木植。奔命不遑。非錢不了。此其苦之當除者十也。

以上十苦既除。則各衙現總之役。自當可。催人代當亦可。誠實之人代當。固不至不病而吟。卽奸猾之人包當。亦豈能無風起浪。省官府多少牌票。省差役無數誅求。庶曷民有安枕之期。比戶有樂生之象。端不負

聖天子軫念小民之至意矣。

勸止健訟芻言

息齋老人自壬寅歲蒙

恩歸田迄今已六年所目擊我三吳地方賦稅繁重徵輸孔亟且路當要衝各項雜差千頭萬緒奔命不遑為我儕小民計惟朝夕拮据謀生上完

國賦下保身家尚虞不支豈容自尋苦累自甘蕩費如健訟一節竟相習成風既作今生怨對又結來世冤仇而恬不省悟也儘有微嫌小隙里戚可解杯酒可釋之事槩裝劫殺抄洗等大冒希圖官府准理甚而

非盜誣盜非命指命其意本欲累人究還自累請悉
言訟之爲害勸我地方人等其諦聽之從來片紙非
易入公門也買狀式要錢代書人要錢歇家要錢訟
師打點要錢自鄉入城路上來回盤費要錢此猶就
不准者言耳萬一准理承牌差役要錢干證供給飯
食要錢關會招房要錢抄錄訴詞審單要錢經旬累
月衙門伺候要錢或本地或過客央情要錢事完得
勝追紙謝保要錢此猶就訟勝者言耳萬一理屈斷
輸皂隸行杖要錢納罪要錢押保差人要錢催贖差

人要錢庫上完贖要錢或甚而羈禁在獄獄中使用
要錢妻子送飯要錢而且皮綻肉破身受箠楚之痛
鬻女賣男家有流離之慘此等苦楚雖佛菩薩爲問
官斷乎難免也况更有一種刁悍之徒不勝不休我
告縣彼且告府廳以壓之我告司道彼且告督撫兩
臺以壓之我告督撫院臺彼且百計投旗以壓之糾
纏葛蔓必致兩敗俱傷身家隨之而後已嗟乎不過
一念好勝使然耳詎料其害抑至此極也余老人係
歸野叟同爲

金文通公集 卷三十五 芻言
朝廷百姓誼均休戚惟願人人樂業安生村村家給戶足庶不負

聖天子軫念小民至意故直布芻言沿門勸化知我罪我非所計也

元宵示賑瞽目窮丐

時屆元宵凡有目者富貴則觀燈貧賤則看月雖一樣元宵兩樣賞翫而心目並耀于光明其快樂無異也獨念乞丐瞽目燈光月色俱無所見此現在之黑闇地獄大可憐憫本宅特損微貲于本月十四日在城隍廟內每雙瞽一名捨白米一升白錢五十文令其發心念佛回光內照庶幾皓月紅燈不以目見而以心見本宅竊與之共遊光明藏中矣元宵獨爲我有哉

元宵示賑有目乞丐

三五良宵。須人我同慶。本宅憐彼瞽目乞丐。如長夜不旦。獨無元宵。已於本月十四日。先行量賑矣。猶念乞丐之有目者。仰視一天明月。莫療饑腸。遙望千門燈火。難炊破竈。恐雙眸炯炯者。致苦半菽之。不飽。反怨兩目之。猶存也。相應亟行補賑。擇於本月十八日。許真正乞丐窮民。齊集圓妙觀聽候。本宅散籌驗給。每名白米一升。白錢四十文。庶幾有目無目。均沾一視之微仁。或後或前。總快元宵之令節耳。至於僧道。

金文通公集卷之二十五 有目乞丐
驛夫不許一槩前來。溷擾徒取厭惡。決不濫給。

金文通公集卷之二十五終

金文通公集卷之二十六

吳江金之俊 豈凡著

年譜韻編

虛度古稀七。流光閃電疾。憶從墮地來。父母愛無匹。
三歲乳母離萱堂。怙食息。七齡瘡痘生。晝夜親憂織。
痘平外傳就。十二開筆墨。胞兄實爲師。講解頗勤憶。
十三應童試。屢試輒見抑。十九改麟經。工夫僅百日。

經淑泰清兄。二十嘉庠入。歲底始完婚。娛親諧琴瑟。
廿一謁雲棲。戒殺奉為律。靈山夙種緣。根苗從茲茁。
廿三大比年。觀場竟莫及。雙親含淚言。年老望子急。
過此再蹉跎。風燭恐將熄。聞訓無地容。發憤不遑食。
廿六倖賢書。廿七南宮弋。循例給假旋。高堂懽始輯。
廿八授除書。獲膺薇省秩。是歲叨覃恩。書債聊爾畢。
循次賦皇華。旋娛雙親膝。期滿仍牽裾。差回恰三十。
歸省寤寐殷。秋又銜命出。恰逢壬戌年。父母皆七十。
兒孫繞階前。天倫樂事緝。癸亥三十一。瓜期漸次卽。

急入春明門。報命已歲逼。甲子三十二。謬竽分考直。
取士十一人。何子非鳴翠。乙丑三十三。考選已及格。
崔魏歐初張。擠排緣獨立。勉就南祠部。歲餘儀司歷。
高堂迎署中。團聚樂無極。容曹吏隱稱。石頭名勝瞻。
是年三十四。愛妾沈氏卒。心緒正無聊。遷郡為順德。
忽焉簿書嬰。兼且衝途值。是年三十五。發憤圖自植。
民瘠頗朴淳。撫字竭心力。各屬解錢糧。原封總不拆。
雖設庫吏書。法馬塵封訖。公費及羨餘。絲毫罄除革。
亢早跪禱勤。除蓋炎威逼。雨來猶長跪。直候甘霖溢。

各臺暨小民上下。譽詞翕。四載獲量移。童叟攀轅泣。罷市幾浹旬。遮道祖送塞。至今南關外。清廉碑篆葺。遄歸嫁長女。老親健逾昔。我年三十九。星沙催任急。長江上下間。寇帆嘗絡繹。設法嚴譏防。擒渠始伏匿。俗習雖豪獷。馴之易以戢。轉瞬二年間。盜靖民寧謐。我年四十一。尋轉大叅級。趨歸上壽觴。親年又八十。較之十年前。歡樂踰伯什。親既壽且康。蘭砌復茂密。盤桓半載餘。方乃奉新檄。駐劄江信州。優游縻俸食。暮年又量移。蜀臬馬湖飭。歸途抵武陵。陡聞父病亟。

星馳入里門。我父喜侍側。執手絮叮嚀。只要兒報國。侍奉十日餘。白日遽西匿。身代亟呼天。天高不肯恤。見母號痛深。徒有捶胸吧。喪禮藉兩兄。勉強拖衰纒。是年四十二。終日背母泣。家門本福全。獨恨怙先失。母悲兼復焦。諄諄望兆覓。移盼倏三年。母躬幸安適。丁丑秋八月。母忽微示疾。身無痛苦纏。易簣猶念佛。遍呼兒孫來。訓誡細微悉。端然逝吉祥。定生西方域。痛哉四年間。雙親相繼沒。憂纏喪次中。我年四十七。幸獲瑩兆圖。筮龜咸叶吉。兩兄皆同心。已卯襄事畢。

家居七八載。無顏小草出。明末時事艱。功令罔敢佚。
庚辰四十八。策蹇長安入。痛念江南苦。冒昧請均役。
疏陳旋報可。部料咸允勒。南瑞兵道銓。是冬卽就職。
瑞寧及奉新。大盜素爲窟。盤踞茅竹山。官兵罔敢執。
挾矢率親丁。徒步上山崩。鄉民皆奮呼。生擒百餘賊。
兩臺深歎嗟。勞勛稱第一。本是遷謫流。誤列知兵實。
言路薦章盈。巖疆遇缺給。辛巳四十九。已轉固原臬。
撫按漕科留。坐題糧道缺。拮据于臨期。催糧又催楫。
策馬章江濱。食息靡寧刻。茹苦百晝夜。船糧共齊集。
飛舸親押催。黃河驚浪吸。連幫銜尾進。抵通事早畢。
一載忽五遷。壬午屯撫陟。受事甫月餘。旋奉督治款。
馬上趨赴任。是年我五十。平臺蒙召對。恩賚驚踰則。
竭蹶戎馬場。我年五十一。經歲枕甲戈。寢食卒伍習。
事平瀝血辭。嘉勞賜幣帛。萬死一生餘。復厠司馬側。
會丁鼎革運。猶如隔世憶。劇嬰流逆苦。自刎復自縊。
惜爲同難救。一死賒塞責。是年五十二。洵丁陽九厄。
痛定還思痛。夢魂恒悚惕。天心厭亂甚。

皇清定夏。函恭逢

順治聖。日月仍麗天。仁德符三代。義旗耀八埏。逆孽芟
除盡。版圖歸附全。用人惟求舊。朝野無遺賢。我本貳
樞曹。覩顏復備員。我年五十三。澄兒北來瞻。父子忽
相逢。驚喜作夢占。但聞三兒泐。是夏已歸泉。可惜恂
雅質。不復依膝前。悲歡一時萃。未幾澄兒南。我年五
十四。濂兒繼入燕。隨例遊太學。偶喜脫青氈。貳樞一
載餘。承乏佐中銓。庶祿甫年半。司空正席專。丁亥戊
子歲。兩兒痘殤煎。尋于己丑夏。徼

恩請假旋。是年五十七。再生入故鄆。里老懼相接。族姓

慶團圓。澄兒廿旨奉孝養。無閒言。福過滋災咎。殃貽
長子捐。雖倖餘生。在五載喪。明連假期。忽云滿。收淚
復命還。庚寅一品加。辛卯中樞遷。是年五十九。生子
名世潛。秉樞係重任。詎意寵眷偏。誓除債帥。弊庶足
答。涖涖濫竿周。二載黜幽宜。我先風紀責。更鉅巽命
又專懸。控辭終未允。黽勉領臺班。受事四閱月。澄清
乏毫纖。虛聲達

睿聰復濫冢卿階。引咎堅辭屢。終負進退擔。是年六十
一。精力漸衰綿。正思圖稅駕。綸扉又特宣。揣分中心

疾彌深伴食慙乙未六十三

欽點總裁官欲簡天下士受命心膽寒焚香明神矢務
使真才殫勉竭宵旦力兢兢大典完是春喪六郎悲
勞傷心肝聞事甫告竣行幄刻加虔一病遂委頓致
動

聖懷酸。

君臣相視泣亟遣太醫探恐如朝露殞又命繪像來

君恩等怙覆捐軀難報天醫藥賴有瘳入直命頻傳隨
行空署尾詎勝啓沃肩丁酉六十五漢兒侍衛編蒙

恩軫及子破格授蝦銜前此乞假後離家又十年引例
陳情切復荷

聖明然臨軒天語囑慎勿戀家園是年六十七又得回
鄉關老妻時病目一見目眚痊別久懽相聚備覺恩
情纏倏焉欽限迫割裾覲

天顏幸已趨北闕又勤欽使遄

天子聞而喜溫言慰勞倦是年六十八躡從南苑畋辛

丑春王初

聖躬忽欠安鼎湖遂莫挽敷天號慟聯况我承

恩渥身殉猶未厭。

新主初登極。寧敢乞投閒。四月方陳請。不肯放歸田。是年六十九。家訃鼓盆潛。九月再補牘。准假仍如前。五十年夫婦訣。別阻雲山。憑棺一痛哭。相逢期禪關。荏苒壬寅歲。正遠古稀年。猶廁黃扉籍。晝夜凜迤邐。激切籲歸老。荷蒙

天恩。全稠疊。隆異數。古今實罕兼。撫躬還循省。益懼報稱難。歷陟院部署。凡十有八年。一品考滿再。十疏方賜骸。由今以。溯往親。恩江海淵。追前以觀後。

言。恩。天地寬。往事經七十。歷歷猶目前。起今腕力健。書此俟攷焉。天猶假年乎。再續留後看。

金文通公集卷之二十六終

賈至專錄十。五。五。餘。日。前。跋。今。錄。以。對。書。

年譜韻編序

昔錢洪甫爲文成先生作年譜凡世所語奇事不書而獨於文成致知之學前後悟入語次尤詳蓋以文成英挺之稟雖異於人而所以能邃于理學發揮于作用者亦不能不待于歷歲踐悟之深也人不可以無年年不可以無譜然自古聖賢豪傑其一生得力之處他人代言之終不若自言之爲親切有味哉余讀太傅息齋公所著年譜韻編不禁作而歎曰嗟乎盡之矣公之生平政事文章及立朝風采勳名顯赫

天下之人或能知之能言之至其夙興夜寐報劬勞于萬一舍茶茹蓼矢九京而不愧者天下之人固未必能知之能言之也然人有身當其易而怠于宦成敗于名高者往往而是公親遘陽九百六之運值雲雷草昧之時可謂難矣而卒能死生不移身名俱泰豈非其得力之處有暗符文成者則今年譜之所編在公亦有不能盡言之者矣而况于他人乎余瀏覽史冊古人之自作年譜者有矣而以年譜爲韻編者則自公始公弱冠之年卽參謁雲棲于心性之學實有所悟故遊戲筆墨灑灑千言老而愈壯而非跼蹐于文字間者所可望也白樂天之頌裴晉公詩有云致成堯舜昇平代收得夔龍康健身又云故情歡喜開書後舊事思量在眼前余小子請以二詩爲公賦之將見百年期頤日升而月恒焉公之譜與年俱無盡矣公听然而笑曰小子殆知我者遂爲序

崑

康熙八年歲次己酉陽月望前二日年家眷小姪宋

寶穎謹題

年譜跋

年譜心書也古達人君子自幼而定志以至少而壯壯而老其間盛衰得喪循環屢變而中之所守屹不可移故隨遇而應之為孝為弟為忠為信為匡濟民物為扶植紀綱舒而煦日祥風慘而霜華冰月皆此心之可以大書特書者也景奉筆札侍吾叔父太傅左右嘗以年譜為請久未之許一日忽以韻語出之凡二千餘言筆不停綴不移日而書成甚矣公之得於心者炯然內湛七十七年如一日也維公幼而

孝長而弟弱齡旗鼓文壇作者遜席少年登第澹若不櫻闈禍熾天退安冷署及爲郡守爲監司爲憲長所至錢穀刑名燭照數計清風惠政聲滿邢晉豫楚至四方多故流氛彼得挺身戎馬鋒鏑間迨十餘載恭遇

聖主開天皇途清泰首膺

隆眷翔步綸扉翊襄機密者十餘年會

世祖賓天遂力籲乞身蒙

恩予告偃息林泉猛謝塵網與深山衲子解徹禪宗則

公之忠愛在

朝廷事業在天下者皆不勝書而一不之及惟書其平生所遇與此心所應要歸於無歉而已雖然因公之心想公之遇又何歲何地不足以溯公生平覩公事業也哉景忝猶子夙蒙撫愛敬抒一言識諸簡末云康熙歲次己酉長至姪景百拜謹跋

全宋通志卷三十一

